

I  
LE VERITABLE.

*De ce qui s'est passe en la presence du  
Royle 8. Januier mil six cens quin-  
se, la loy proposee aux Estats tou-  
chant la Sacree personne des Roys,  
Conformement aux Arrests de la  
Court de Parlement.*

**L**E meurdre de nos Roys estant  
passé en Coustume par la mau-  
uaise doctrine qui se preische en  
France: les bons & fidelles François  
proposerent aux Estats, d'establi-  
r vne loy fondamétalle, que les Roys  
des Fleurs de lys ne releuent d'autre  
que de Dieu, & en ceste qualité ne  
reconoissent aucune puissance  
superieure.

Ce qui fust embrassé, par le tiers  
Estat du Royaume, d'autant plus  
courageusemēt qu'ils y estoient apu-  
yés par les exemples que nous en

A



auons par la Creance vniuerselle, &  
par les Arrests du premier Parle-  
ment du mōde, qui la ainsi Estably  
& ordonné,

Sur ce le Clergé s'esmeust depute  
vers sa Majesté, laquelle voulut sur  
ce ouyr son parlement, & assembler  
sō Cōseil pouren deliberer, surquoy  
y eust grande Contestation.

Or ledict Clergé estimant que  
leurs Deputes n'auoyēt assez biéfait  
& que leur Cause estoit perdue, ont  
resolu d'y aller en corps, & de fait  
le viij. Ianuier 1615, l'Euesque d'An-  
gers, assisté de Messieurs les Cardi-  
naux, & de plusieurs Euesques, ha-  
rangua longuement deuant sa Ma-  
jesté estant en son Conseil, la Roy-  
ne sa Mere Mōseigneur le Prince, &  
autres Princes & Seigneurs presants  
& entre autres choses dit qu'en la  
Contestation qui est entre le tiers  
Estat & le Clergé y a deliberation

la c.

F

39

326

1615 ver

du Parlement sur vn point de Religion qui n'appartient qu'aux Catholiques, & entre les Catholiques estre traicté & terminé par le Clergé: a ceste Cause que le Clergé recuse ceux de la Religion pretendue & Reformee.

Monsieur le Duc de Bouillon voyant que ces discours s'adressoient a luy prist la parole & s'adressant audit Euesque dit qu'il auoit esté au Conseil de sa Majesté ou il auoit dit son opinion sur ce qu'il estimoit estre vn point touchant la Souueraineté & temporalité des Roys, & nō vn point de religion: que si c'eust esté vn point de doctrine & de Religion, il s'en fust abstenu a cause de la profession qu'il fait.

Sur ce luy fust dit par Monsieur le Cardinal de Sourdis que c'estoit sagement parlé a luy de dire qu'il ne vouloit Cognoistre d'un point de



4  
Religion mais qu'on luy soustenoit  
ques'en estoit vn.

Le Cardinal du Perron en dit autant,  
& adiousta que c'estoit vn point  
de doctrine : que sur ce point il a-  
uoit dit les jours passez que la que-  
stion estoit problematique: mais que  
maintenant il n'auroit Cours, &  
soustenoit que la puissance du Pape  
estoit plenissime & directe au Spiri-  
tuel & indirecte au temporel: que  
ceux qui vouloient soustenir le Cō-  
traire estoient & Chismatiques &  
Heretiques, mesmes ceux du Parle-  
ment qui auoient succé le lait des  
Cours: que si sa Majesté ne castoit  
promptement l'arrest du parlemēt  
& ne faisoit biffer les Conclusions  
des gens du Roy qu'ils se retireroiēt  
des Estats: mais qu'y estants com-  
me en vn Concille notional, ils ex-  
communieroiēt tous ceux, qui se-  
ront contraires a la proposition af-



5  
firmatiue qui est que le Pape peut  
deposer les Roys.

le Cardinal de Sourdis adiousta,  
que quand sa Majesté ne voudroit  
point souffrir qu'ils procedassent  
par censures Ecclesiastiques, qu'ils ne  
laisserôt de le faire d'eussent ils sou-  
frir le martire: & sur ce ils recuserent  
Monseigneur le Prince.

Sa Majesté dit lors & v sa de ces  
mesmes termes, il me recuseront a  
la fin aussi biē que vous autres, parlāt  
aux princes qui estoient pres de sa  
personne Monseigneur le Prince  
dit audit Cardinal, qu'il l'excusoit,  
& qu'il auoit la teste bien legere.

Fut respondu par ledit Cardinal  
audit Seigneur Prince, ie n'iray pas  
chercher du plomb dans la vostre.

A quoy fust repliqué par ledit  
Seigneur le Prince, si ce n'estoit le  
respect du Roy & que vous estes  
prestre? ie vous feroys donner les



estriuières par mes lacquais: sur ce sa Majesté se leua, prist ledit Seigneur le Prince & l'embrassa deux ou trois fois au plain Conseil, & le remercia du soing qu'il auoit de sa personne le priant de ne le quitter point.

Le lendemain la Court de Parlement fist de grandes remonstrances: Mais sadiète Majesté voyant le trouble que ceste diuision apporteroit a son Estat a ordonné par l'aduis de son Conseil: que sa Majesté reseruoit a sa personne la decisiõ de ce differant, & l'interdisoit a tout autre.

Cest arrest porté audiet Parlement le vandredy X. dudit mois a esté delibéré les chambres assemblees si la Cour debuioit Enregistrer cest arrest ou non.

F I N.





